

## 35-B. NIKODEMO Yohana 3:1-21 (o Numbers 21:4-9)

Ore nabo olong' ketii Yesu te Yerusalem te rishata e Pasaka. Eiteng'ena iltung'ana tiatua enkolong' pooki. Ore teipa, nelo ewueji neiragita. Etii apa oltung'ani lo Lfarisayo oji enkarna Nikodemo. Ore enkewarie, nelotu Nikodemo enetii Yesu, nejoki ninye, "Rabbi, kiyiolo aajo ira iyie olaiteng'enani oing'uaa Enkai; amu meetae oltung'ani oidim ataasa kuna kitoduaat nias iyie te nemeboitare Enkai ninye"

Newaliki Yesu ninye, "Esipa, esipa, aajoki iyie, te neitu eini oltung'ani aagil te inoto naing'uaa shumata, nemeidim atoduaa Enkitoria e Nkai."

Nejoki Nikodemo ninye, "Kaji eiko pee eidimi aatoiu oltung'ani etaa moruo? Keidim ninye atushukokinoyu eniare enkoshoke e ng'otonye metoini?"

Newaliki Yesu ajoki, "Esipa, esipa, aajoki iyie, te neitu eini oltung'ani te nkare o te Nkiyang'et, nemeidim atijing'a Enkitoria e Nkai. Ore ina natoiwuoki to sesen, naa osesen, ore enatoiwuoki te Nkiyang'et naa enkiyang'et. Ming'asia te naajoki iyie, 'Meeta nchere pee miking'ili aaiu.'"

Eton Nikodemu meibung' enetejo Yesu nejoki ninye, "Kaji eiko pee eidim aataa kuna baa?"

Neaku eitadamua Yesu Nikodemo enaikununo enkatini oo inkera e Israeli apa pee etii tiatua ong'ata tenebo Musa. Neuro ninche imbaa torrok ti alo Enkai o Musa. Neing'unyung'uny ninche ejo, "Kainyoo pee iyaua iyiook aitupuku te nkop e Misiri maetu aaye tene tiong'ata? Amu metii endaa nemetii enkare, neitirika iyiook ena daa nemeeta tipat." Negoru Enkai tenkaraki engolong'u enye neirriu ilasuriaa oopi atua iltung'ana. Neony ninche iltung'ana o metaa etuata ilkumok.

Nepuonu iltung'ana enetii Musa, nejoki, "Kitaasa iyiook eng'oki, amu kiroro iyiook mbaa torrok ti alo Olaitoriani o tialo iyie; toomono Olaitoriani pee eiwuang'ie ninye ilasuriaa te iyiook." Neaku etoomonoko Musa iltung'ana. Nejoki Olaitoriani Musa, "Intobira olasurai lo suyai nipik shumata e ng'ape; naa te nelo neony olasurai likae tung'ani, neing'or ninye ilo asurai lo suyai nepok."

Nejoki Yesu Nikodemo, "Ore anaa enailepie Musa olasurai ti ong'ata meeta nchere pee eitu eilepieki Enkerai e Tung'ani aaiko neijia, paa ore pooki ng'ae oiruk ninye netum enkishui nemeish. Amu etonyorra Enkai enkop aiko nji o meishoru Enkerai enye nabo, paa ore pooki ng'ae oiruk nemeimin kake netum enkishui nemeish. Ore ilo oiruk ninye nemeiguanareki, ore ilo lemeiruk neidipaki aaiquanare, amu eitu eiruk enkarna e Nkerai inoti nabo e Nkai."

### ENKIPANGATA E NKISOMA

**ENE DUKUYA:** Inkilikuana ena kilikuanata eton eitu iliki enkatini

- Kainyioo idamu iyie anaa keji einoto e are?

**ENKATINI:** Toliki enkatini ningiligili tenebo anaa olturrur pee eyiolo pooki ng'ae

**INKIKILIKUANAT NAIMAKINI TENEBO:** Taasishore kuna kilikuanat pee irororie tenebo enaikununo enkatini

## **KAINYIOO KINTENG'ENA ENA ATINI NAIPARTA YESU? Kaji kinko pee kidol aajo ore Yesu naa Enkai?**

- **Kaji eiko teneitodolu ena atini nchere keata Yesu enkidimata sapuk?**
  - Keata Enkai engolon naibeleyenye iltauja.
  - Eitamio Enkai lelo apa Siraeli oogolong'u te keeya.
  - Etuutayie ilasuriaa meetu aony ile Siraeli.
  - Eitobirua enkoitoi to losho loo Siraeli pee eitajeuni tenena onyot o ilasuriaa.
  - Keata ninye eng'olon pee eisho iltung'ana oltau ng'ejuk. Inchere peyie eigili aiu ninche.
  - Keata engolon pee eishoru enkishui nemeish.
- **Kaji eiko teneitodolu ena atini nchere keyiolo Enkai (Yesu) pooki toki?**
  - Etayiolo apa Yesu ina nayieu Nikodemu.
  - Etayiolo apa Enkai enkingunyunguny oo Siraeli, neyiolou enaiko teneitame ninche nerikoo ninche metijing'a atua enkirridunoto.
  - Keyiolo Enkai e mpukunoto e pooki tau too iltung'ana pooki.
- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
  - Eitamio Enkai Isiraeli oogira apa aing'unyunguny tenkaraki engolong'u enye.
  - Ore lelo apa otanyaita eiruk tialo enkoitoi enjeunoto naitobirua Enkai, neiguanareki ninche o metabaiki keeya tenkaraki nkiasin enye torrok. Ore lelo otanyaita ewang'an nebibk tiatua enaimin.
- **Kaji eiko teneitodolu ena atini nchere keata Enkai (Yesu) empiris? (enyorrata, neata oling'ur too laing'okok, esupatisho, neuro o ltungana)**
  - Ore enkoitoi enjeunoto naa tenikiini aigil eniare, aiu te nkiyang'et, naa Enkai ake naidim ataasa ena.
  - Neitobiraki Enkai Isiraeli enkoitoi najeunyie, hoo duoo apa nenare ninche keeya tenkaraki enkingunyunguny enye, nemeata sii apa enkirukoto.
  - Keitobiru Enkai enkoitoi too laing'ok pee meimin kake pee engamu enkishui oo ntarasi, eiruk ninche Yesu, enkerai e Nkai.
- **Kaji eiko ena atini teneutaki iyiook inchere KEISILIGAYU Enkai? ( meibeleyenya, keibung inkisiligat enyena, keas sii inaajo)**
  - Neitabaya Yesu enapa kisiligata inchere keaku ninye eisho e nkitok (Enkiterunoto 3:15), olaa ninye omirr keeya.
  - Neitabaya Yesu enkisiligata te Abraham pee emayian enkop pooki eimu eishoi enye. (Enkiterunoto 12:3)
  - Ore tiatua olning'o musana pooki, neishorua Enkai inkitodolunot o Laitajeunoni apa oisiligishoreki. Ore anaa enailepieki olasurai tolpurkel pee eing'or olorere peyie eitajeuni tialo enkitamioto too ng'ok enye, naa enkitodolunoto naibala nautu inchere keilepieki sii ninye Yesu to Salaba tialo ilaing'okok. Ore lelo "oing'orr" osalaba tiatua enkirukoto neitajeuni. Kegira apa Enkai aasisho tiatua enkatini sapuk eimu inkaatini e biblia pee esaru tung'anisho.

## **KAINYIOO KINTENG'ENA ENA ATINI NAIPARTA OLTUNG'ANI?**

(tenkitanyaanyukoto. Keata oltung'ani tipat te Nkai; olaingokoni; meidim aitajeu kewan.)

- Etonyorra Enkai oltung'ani oleng' pee eishoru enkerai enye nabo peyie elotu aye tialo oltung'ani.
- Ore oltung'ani naa olaing'okoni. Ore eng'olong'u oltung'ani netooro ninye o Enkai. Etogolong'utua Isiraeli tialo enkingunyunguny enye.
- Meidim oltung'ani aitajeu kewan. Meidim apa Isiraeli aitajeu ate. Ore eyia nejia, meata olaing'okoni arashu ilaing'okok oidim aitajeu ate te nkiyang'et. Lasima pee eini aigil, amu eshomo aapuku tiatua o ewang'an.

- o Ore pee elotu embatatata, netonyorra oltung'ani enaimin alang ewang'an amu torrok inkiasin enye. Etanya ninche ewang'an te nkiterunoto.

### **KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)**

(Enkitanyaanyukoto. Keidim ake ayeu enetii Enkai anaa enajo eyieunoto enye o enkipankata enye. Lasima pee elotu enetii ninye te nkirukoto, neirridu pee eitajeuni.

- Ore enjeunoto naa ketumi ake teneisiligi ina oittoi naishoru Enkai. Eing'ura apa Isiraeli olasurai te ng'ape anaa enaishorua Enkai, aisilig Enkai tialo eyieunoto enye. Ore ilaing'okok pooki nenarikino neisilig Yesu, olaa ninye apa etudumuaki aik to salaba pee elak olekoisiayio loo ng'ok ang'.
- Ore oltung'ani naa lasima neini aigil eniare. Netum oltau oibelekenye, oyau Enkiyang'et Sinyati netum atayiolo ing'ok enyena, neirridu nepik osiligi lenye atua Yesu.
- Ore einoto e are naa pee ilo aing'uaa keeeya nijing atua enkishui.

**INKIKILIKUANAT NIKIASISHORE TE NKIBELEKENYATA E NKISHUI:** (Tegelu enkikilikuanata nabo arashu aare niindim aiteng'enayu.)

- **Kaa oittoi tiatua enkishui ino itonyorra iyie enaimin aitalang' ewangan? Ketii inkoittoi tiatua enkishui ino nikigira aitodol keeya arashu enkiturraroto o siligi tiatua enkishui ino tenkaraki ing'ok inono? Tia oittoi kindim atareto ilo kilikuai apa oishooki Nikodemu?**
- Ekitoiwuoki iyie aigil? Keibelekenya Enkai oltau lino pee indim atoduaa ing'ok inono o eyieunoto niata tialo olaitajeunoni? Ore paa keng'orr, indim atang'arie likae airukoni, nining'u inchere kainyioo eitodolu tenincho enkishui ino Yesu.
- Amaa ira iyie Olairukoni, amaa ketii imbaa/embae tiatua enkishui ino nagira aiwuang'ie inkonyek inono te Yesu? Kainyioo nanarikino nirridu te nkishui ino? Inyaaki tipika osiligi lino atua empiris e Nkai.